

Greenland Airports International A/S-imi piginnissutsit tamakkerlugit pissarsiarinissaat siunertaralugu, Naalakkersuisut naalagaaffiup oqartussaasuinut (Rigsmyndighederne) saaffiginninnissaannut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Pele Broberg, Naleraq)

(Siullermeerineq)

Inatsisartunut ilaasortap Pele Broberg-ip siunnersuutaanut qujanaq.

Attaveqaasersuutit pisariaqavissut najukkami, Kalaallinit nakkutigineqarnissaannik kissaatigisamut Demokraatit isumaqataapput. Tamanna inuiaqatigiittut anguniassallugu sulissutigisariaqarparput. Attaveqaasersuutit ulluinnaatsinnut, siunissatsinnullu aalajangiisut nammineq pigalugillu aquttariaqarpagut. Kisianni aamma ilutigisaanik piviusorsiorpalaartariaqarpugut. Aningaasaqarneq eqqarsaatigisariaqarparput.

Naalagaaffiup Greenland Airports International A/S-imi piginneqataassutaasa tamakkerlugit pissarsiarinissaannik kissaatigineqarluni siunnersuummut matumunga aamma tunngatillugu. Tassannga kalaallit tamakkiisumik piginnittuunissaannik kissaateqarnermut Naalakkersuisut isumaqataasut paasivarput.

Naalakkersuisulli erseqqissaatigaat, tiguisoqassappat piffissaq tigussiffiususaaq nunami aningaasaqarnikkut inissisimanermut naleqqulluinnassasoq. Naalagaaffiup Greenland Airports International A/S-imi piginneqataassutai tiguneqassappata annertuumik aningaasartuuteqarfiusussamik tamanna isumaqatiginninniutigineqartariaqarpoq, nalingina nalilerneqartariaqarpoq, inatsisilerituumillu siunnersorneqartariaqarluni.

Aningaasaqarnikkut massakkut inissisimaneq tunngavigalugu Demokraatit isumaqarput, inuiaqatigiit aningaasaataat killeqartut suliassaqarfinnut innuttaasut ulluinnaannut toqqaannartumik sunniuteqartunut atorineqarunik naleqqunnerussasoq. Soorlu peqqinnissamut, ilinniartitaanermut, isumaginninnermilu suliniutinut. Pisariaqartitsineq taakkunani annerpaavoq, aningaasallu atorsinnaasat tamarmik innuttaasunut annertuumik allannguisinnaallutik. Aningaasaqarnikkut aatsaat periarfissaatillugu, Greenland Airports International A/S-imi piginneqataassutsit sinnerisa tigunissaannut alloriartariaqarpugut.

Tassunga tunngatillugu erseqqissaatigineqassaaq, Kalaallit Airports A/S-imut Greenland Airports International A/S-imi aktianut 67 procentinik piginnittuusumut piginnittuuneq aqqutigalugu, maani nunatsinni ingerlateqatigiiffimmut amerlanerussuteqartutut nakkutiginnittooreatta. Taamaalluta ingerlateqatigiiffimmi ingerlatsinermut, aalajangiinernullu sunniuteqareerpugut, imaanngilarlu nakkutiginningsugut.



Taamaattumik aningaasaqarneq, periusissiatigullu qaqugu aamma qanoq danskit piginneqataassusiinik tiguisoqaruni naleqqunnerpaassanersoq erseqqissumik misissueqqissaartoqarnissaa Naalakkersuisut allannguutissatut siunnersuutigisaat malissallugu isumatusaarnersaaq. Qajannaatsumik tunngavilimmik, piffissarlu eqqorlugu aalajangiisoqarnissaa qulakkeerneqarluni, tamanna akisussaaffilimmik iliornerussaaq. Attaveqaasersuutitut pisariaqavissunut maani tamakkiisumik piginnittuunissap sulisutitigineqarnissaa, aningaasaqarnikkulli akisussaassuseqartumik aamma siunissamut qulakkeerisumik sulisutitigineqarnissaa Demokraatinut aalajangiisuvoq. Siunissamut ungasinnerusumut isigaluni pilersarusiortoqarlunilu aalajangiisoqartariaqarpoq, siunissamilu aningaasaqarnikkut aamma politikkikkut nukittuumik inissisimanissaa qulakkeerneqartariaqarluni.

Taamatut oqaaseqarlunga inassutigaarput, Naalakkersuisut allannguutissatut siunnersuutaat Aningaasaqarnermut Akileraartarnermullu Ataatsimiititaliami oqaluuserineqassasoq.